



Vogošća, ul. Jošanička br. 80, tel: 00387 33 586-411

Na osnovu člana 71. Statuta Općine Vogošća ("Službene novine Kantona Sarajevo", br. 27/14 – Prečišćeni tekst, 14/15, 9/20 i 23/24), Općinski načelnik donosi:

P R A V I L N I K
o načinu ocjenjivanja pristiglih prijedloga udruženja/fondacija
(organizacija civilnog društva/nevladinih organizacija) u okviru Javnog poziva za realizaciju
projekta Centra za zdravo starenje Vogošća

Član 1.

(Predmet)

Ovim Pravilnikom se uređuje način ocjenjivanja pristiglih prijedloga udruženja/fondacija (organizacija civilnog društva/nevladinih organizacija) u okviru Javnog poziva za realizaciju projekta Centra za zdravo starenje Vogošća.

Član 2.

(Imenovanje i rad Komisije za ocjenjivanje i odabir)

(1) Komisiju za ocjenjivanje i odabir pristiglih prijedloga po osnovu Javnog poziva udruženjima/fondacijama (organizacijama civilnog društva/nevladinim organizacijama) za realizaciju projekta Centra za zdravo starenje Vogošća, biće imenovana Rješenjem od strane Općinskog načelnika.

(2) Komisija za ocjenjivanje i odabir će se sastojati od ukupno tri člana.

(3) Komisija za ocjenjivanje i odabir će na prvom sastanku komisije donijeti Poslovnik o radu Komisije za ocjenjivanje i odabir.

(4) O radu Komisije za ocjenjivanje i odabir, obavezno će se voditi Zapisnik.

(5) Dokumentacija koja je dostavljena neblagovremeno, nepotpuno, neuredno popunjena, bez pečata i bez potpisa ovlaštenog predstavnika na predviđenom mjestu, Komisija za ocjenjivanje i odabir neće je uzimati u razmatranje.

(6) Komisija za ocjenjivanje i odabir će za svoj rad biti odgovorna Općinskom načelniku.

(7) Komisija za ocjenjivanje i odabir će dostaviti Općinskom načelniku prijedlog ocjena pristiglih projekata.

Član 3.

(Nadležnost Komisije za ocjenjivanje i odabir)

(1) Zadaci Komisije za ocjenjivanje i odabir je otvaranje pristiglih prijedloga projekata, razmatranje ocjena i odabir pristiglih prijedloga projekata po Javnom pozivu.

(2) Pristigli prijedlozi projekata potrebno je da se odnose na:

1. Promociju zdravlja i poboljšanje kvaliteta života osoba treće životne dobi;
2. Poboljšanje socijalne uključenosti osoba treće životne dobi u zajednicu i društvo.

(3) Realizacija predloženog projekta mora obuhvatiti navedene aktivnosti:

- a) Kulturno-edukativne sadržaje;
- b) Kreativne radionice;
- c) Rad u sekcijama;
- d) Obilježavanje značajnih datuma za zdravstvo;

e) Obilježavanje značajnih datuma vezanih za socijalnu zaštitu, prvu pomoć, Dan Općine Vogošća;

f) Obilježavanje državnih i vjerskih praznika;

g) Realizacija rekreativnih programa;

h) Razvijanje volonterizma i međugeneracijske solidarnosti.

(4) Sve aktivnosti koje podnosioc prijedloga projekta navede bit će razmotrene i procijenjene u skladu sa sljedećim kriterijima:

a) Ispunjenje uslova:

- da je dostavljena sva obavezna i dodatna dokumentacija;
- da je sva obavezna i dodatna dokumentacija dostavljena u 2 (dva) primjerka (štampana);
- da su obuhvaćene sve aktivnosti na realizaciji predloženog projekta.

b) Procjena kvaliteta realizacije projekta i finansijska evaluacija:

Procjena kvaliteta realizacije projekta, uključujući i predloženi budžet, vršit će se u skladu sa kriterijima utvrđenim u Tabeli za ocjenjivanje, koja čini sastavni dio ovog pravilnika.

(5) Postoje dvije vrste kriterija za ocjenjivanje: kriteriji za odabir i kriteriji za dodjelu sredstava. Cilj kriterija za odabir je da pomognu u procjeni finansijskih i operativnih sposobnosti aplikanta kako bi se osiguralo da oni:

- imaju stabilna i dovoljna finansijska sredstva za vlastiti rad tokom cjelokupnog perioda realizacije projekta;
- posjeduju profesionalne sposobnosti i kvalifikacije potrebne za uspješnu realizaciju kompletnog projekta.

(6) Komisija za ocjenjivanje i odabir će donijeti Zaključak o rezultatima Javnog poziva.

(7) Na Zaključak o rezultatima Javnog poziva, aplikanti će imati pravo prigovora Drugostepenoj Komisiji za rješavanje po prigovorima o rezultatima Javnog poziva, u roku od (5) dana nakon objavljivanja rezultata na web stranici Općine Vogošća i na oglasnoj ploči Općine Vogošća.

(8) Rješenjem Općinskog načelnika biće imenovana Drugostepena Komisija za rješavanje po prigovorima o rezultatima Javnog poziva, koja će se sastojati od ukupno tri člana.

Član 4.

(Sistem bodovanja – Kriterij ocjenjivanja podijeljeni su na sekcije i podsekcije)

(1) Svaka podsekcija se obavezno ocjenjuje ocjenama od 1 do 5 na sljedeći način: 1 = veoma loše; 2 = loše; 3 = odgovarajuće; 4 = dobro; 5 = veoma dobro. Svaki član Komisije potpisuje svoju individualnu tabelu za ocjenjivanje, a svi članovi zajedno potpisuju zbirnu tabelu za svaki projektni prijedlog. Rangiranje prijedloga realizacije projekta vrši se na način da je prvoplasirani onaj koji ima najveći zbir bodova, zatim slijedi projekat s prvim sljedećim nižim zbirom bodova, i tako do najnižeg zbira osvojenih bodova.

(2) Samo prijedlozi za realizaciju projekta koji su dobili više od 50 bodova bit će razmatrani za finansiranje, jer prijedlozi ispod ovog praga nisu u stanju da zadovolje postavljene standarde pa bi efikasnost njihove provedbe mogla biti upitna.

(3) Prioritet pri odobravanju sredstava imat će projekat s najvećim brojem bodova.

(4) Ukoliko je ukupan zbir u Sekciji br. 1 niži od 10 bodova, prijedlog aplikanta će biti isključen iz daljeg procesa ocjenjivanja jer je procijenjeno da OCD/NVO nema ni minimalne kapacitete za kvalitetnu realizaciju predloženog projekta.

(5) Ukoliko je ukupan zbir u Sekciji 2 niži od 18 bodova, prijedlog aplikanta će biti isključen iz daljnjeg procesa ocjenjivanja jer ovakva procjena podrazumijeva da, iako podnosioc prijave zadovoljava finansijske i operativne kapacitete, sama predložena ideja nije relevantna niti je u skladu sa definiranim prioritetima iz javnog poziva, te ne utiče u dovoljnoj mjeri na zadovoljenje potreba lokalne zajednice.

Član 5.

(Prestanak)

Stupanjem na snagu ovog Pravilnika prestaje da važi Pravilnik o načinu ocjenjivanja pristiglih prijedloga udruženja/fondacija (organizacija civilnog društva (OCD)/nevladinih oorganizacija (NVO) u okviru Javnog poziva za realizaciju projekta Centra za zdravo starenje Vogošća broj: 02-31-23-1/24 od 08.01.2024.godine.

Član 6.

(Stupanje na snagu)

Ovaj Pravilnik stupa na snagu narednog dana od dana objave na Oglasnoj ploči i web stranici Općine Vogošća.

Broj: 02-31-71/26

Vogošća, 21.01.2026. godine

**PO OVLAŠTENJU OPĆINSKOG NAČELNIKA
POMOĆNIK OPĆINSKOG NAČELNIKA**

Fetah Kadrić